

## 1 **Din ed ils pertschients**

2 Eau nu'm vuless glorificher, poss però dir ch'eau d'eira ün scolar mediocar. In  
3 matematica d'eiri püchöntsich sur la media. Fer quints d'eira mia fermezza. Perque  
4 esa chapibel ch'eau d'he frequento la scoula da commerzi e sun daspö ans contabel  
5 diploma in ün'impraisa d'importanza naziunela.

6 Però da las voutas squassi il cho, pensand a mieu conscolar da pü bod, Din. Quel ho  
7 bain fat tuot ils ans da la scoula obligatorica da vschinauncha, ma na tuot las  
8 classas. Illa vita s'ho Din però cumpruvo telmaing, ch'eau sun minchataunt quasi  
9 invilgiuoss.

10 Din posseda üna fabrica chi gira, ho üna villa da luxus ed üna chesa da vacanzas in  
11 ün lö da bellezza sper il lej da nossa vschinauncha d'origen. Üna vouta, düraunt il  
12 temp da vacanzas, am d'heja inscuntro cun Din e nus vains rinfras-cho algordanzas  
13 da pü bod ed eau d'he piglio l'ocasiun per eruir il motiv dal success professionel da  
14 mieu cumpagn da scoula da pü bod.

15 Din es sto reservo ün mumaint e m'ho alura confido il seguaint detagl: „Tü sest  
16 ch'eau d'eira üna nolla in scoula primara!“

17 „Üna nolla nu vulessi güst dir“, respuond eau e cuntinuesch „però fer quints nu d'eira  
18 tia fermezza.“

19 „Güst perque d'heja penso“, piglia Din darcho il pled „da banduner uschè svelt scu  
20 pussibel il baunch da scoula e fer il sagl our aint illa vita pratica.“

21 „Che giarsunedi hest fat?“

22 „Che giarsunedi da quel temp! Nouv ans scoula haun bastieu ed alura ün sagl scu ün  
23 vdè our aint illa vita pratica.“

24 „A fo l'impreschiun cha la vita da professiun at saja reuschida?“

25 „Eau d'he lavuro duos ans e zieva la scoula da recruta d'heja miss sü ün offer.“

26 „Bain ün offer da prodür braschuns?“

27 „Exact scu cha tü dist.“

28 „E cu hest fat culs quints?“

29 „Que es bod sto pü simpel cu la lavur manuela da la bunura bod fin tard la saira.“

30 „Ma cu alura?“

31 „Eau at vögl dir que cun ün exaimpel. Ils cuosts da fabricaziun d'eiran ün franc per  
32 braschun. Eau vend il singul töch per trais francs e cun quels duos pertschient  
33 guadagn d'heja gieu üna buna existencia ed eau stun bain“, accentuescha Din illa  
34 maniera d'üna persunalited arriveda.

35 Eau d'he stuvieu travuonder vöd püssas voutas ed alura d'heja guardo directamaing  
36 sün Din e d'he dit:

37 „Que sun pelvair stos buns pertschients!“

*(tenor Toni Berther)*